

## **ORDENANZA FISCAL NÚM. 18**

### **TAXA POLA REALIZACIÓN DE ACTIVIDADES ADMINISTRATIVAS DE INSPECCIÓN, CONTROL E VERIFICACIÓN DE ACTIVIDADES EN RÉXIME DE DECLARACIÓN RESPONSABLE.**

En uso das facultades concedidas polos **artigos 133.2 e 142 da Constitución** e polo **artigo 106 da Lei 7/1985, do 2 de abril, reguladora das Bases de Réxime Local**, e de conformidade co que se dispón nos **artigos 2, 15 a 19, 20.4.i) a 27 e 58 do texto refundido da Lei reguladora das facendas locais, aprobado por Real decreto lexislativo 2/2004, do 5 de marzo**, este Concello establece a taxa pola realización de actividades administrativas de inspección, control e verificación da apertura de actividades económicas sometidas ao réxime de declaración responsable, que se rexerá pola presente ordenanza fiscal.

#### **Artigo 1. NATUREZA E FEITO IMPOÑIBLE.**

1. De conformidade con canto se establece polo **artigo 20.4.i) do texto refundido da Lei reguladora das facendas locais, aprobado por Real decreto lexislativo 2/2004, do 5 de marzo**, na redacción dada pola **Lei 2/2011, do 4 de marzo, de economía sostible**, constitúe o feito impoñible a prestación da actividade municipal, técnica e administrativa de control e comprobación para os efectos de verificar se a actividade realizada ou que se pretende realizar se axusta ao cumprimento dos requisitos establecidos na lexislación sectorial reguladora desta, así como na urbanística, sobre ruídos, accesibilidade, medio ambiente e no Código Técnico da Edificación, de calquera actividade económica: agropecuaria, industrial, comercial, profesional, de servizos, etc, cuxa apertura se realice en réxime de declaración responsable ou comunicación previa, así como as súas modificacións, co obxecto de procurar que estes teñan as condicións de tranquilidade, seguridade, salubridade, medio ambientais, acústicas e calqueroutras esixidas polas normas reguladoras do exercicio da actividade de que se trate.

Todo iso de acordo coas facultades de intervención administrativa conferidas aos municipios polo **artigo 84 e 84.ter da Lei 7/85, do 2 de abril, reguladora das Bases do Réxime Local**.

2. Estarán suxeitos a esta taxa todas as actividades cuxa apertura se regula na **ordenanza reguladora da apertura de**

**actividades económicas non sometidas á avaliación da incidencia ambiental** nas que resulte obrigatoria a realización da actividade de inspección verificación nos termos establecidos no parágrafo anterior ao tratarse de actividades non suxeitas a autorización ou control previo e, entre outras, os seguintes:

- a) A primeira instalación dun establecemento ou actividade agropecuaria, industrial, comercial, profesional ou de servizos, en réxime de declaración responsable.
- b) Ampliación de superficie de establecementos con licenza de apertura, sempre que non implique unha modificación substancial da actividade.
- c) Ampliación de actividade en establecementos con licenza de apertura sempre que non se trate dunha modificación substancial desta.
- d) Ampliación de actividade con ampliación de superficie en establecementos con licenza de apertura, sempre que non se trate dunha modificación substancial.
- e) Reforma de establecementos con licenza de apertura, sen cambio de uso nin ampliación superficial nin da actividade.
- f) A reapertura de establecemento ou local, por reiniciar a esta o titular que obtivo licenza no seu día, se a licenza non tivese caducado.
- g) A posta en coñecemento da administración de calquera modificación dunha actividade que se realizou a preceptiva declaración responsable.
- h) Cambio de titular nas actividades nas que xa se realizou a preceptiva declaración responsable, tendo tal consideración a posta en coñecemento da administración do dito cambio por persoa distinta que para seguir exercéndoa nun establecemento sempre que tanto a propia actividade, o establecemento onde se desenvolva e as súas instalacións non sufrisen modificacións respecto á desenvolvida polo anterior responsable e conforme á súa declaración, salvo as que expresamente se impoñan por precepto legal.

3. Para os efectos desta taxa, entenderase por establecemento toda edificación, instalación ou recinto cuberto, ou ao aire libre, estea ou non aberto ao público, ou como complemento ou accesorio doutro establecemento ou actividade principal, destinado, habitual ou temporalmente, ao exercicio de actividades económicas por conta propia.

## **Artigo 2. EXENCIONES.**

Non se prevén máis exencións que as previstas nas leis ou tratados internacionais.

### **Artigo 3. SUXEITOS PASIVOS.**

Son suxeitos pasivos a título de contribuíntes, as persoas físicas ou xurídicas e as entidades a que se refire o **artigo 35.4 da Lei xeral tributaria**, titulares ou responsables da actividade que se pretende desenvolver ou xa se estea desenvolvendo en calquera establecemento industrial, mercantil ou de servizos en xeral, que inicien expediente de solicitude de licenza ou similar para esta, ou se é o caso, por que presente declaración responsable.

### **Artigo 4. TARIFA.**

**4.1. Tarifa básica para nova implantación con superficie ata 100 m<sup>2</sup>: 200,00€.**

#### **4.2. Coeficientes de incremento pola superficie do local:**

Aquelas actividades que se desenvolvan nun establecemento permanente tributarán pola tarifa básica incrementada pola aplicación dos seguintes coeficientes:

<b>SUPERFICIE DO LOCAL</b>	<b>COEFICIENTE DE INCREMENTO</b>
Menor de 100 m <sup>2</sup>	<b>Tarifa básica</b>
Entre 100 e 200 m <sup>2</sup>	<b>1,5</b>
Entre 200 e 500 m <sup>2</sup>	<b>2</b>
Entre 500 e 1000 m <sup>2</sup>	<b>2,5</b>
Mayor de 1000 m <sup>2</sup>	<b>3</b>

#### **4.3. Incremento en relación ao tipo de control esixido coa repercusión dos custos no solicitante:**

- a) Control sobre ruídos e vibracións: custo para o Concello.
- b) Control sobre vertidos á rede municipal ou a fosa séptica particular: custo para o Concello.
- c) Calqueroutro control que sexa esixible conforme á normativa aplicable: custo para o Concello.

#### **4.4 Modificacións de licenzas.**

Os establecementos e actividades xa legalizados e as instalacións propias destes que sufran modificacións substanciais, que alteran e modifican a declaración responsable anterior, aboarán unha cota equivalente aos supostos de nova implantación. No caso de que a ampliación de superficie non afecte ás instalacións autorizadas, tomarase como superficie a que corresponda á ampliación do establecemento.

Os establecementos e actividades xa legalizadas e as instalacións propias deles que sufran modificacións non substanciais, e polo tanto que non alteran e modifican con carácter substancial a declaración responsable anterior, aboarán unha cota do **50%** que lle corresponderá como nova implantación.

#### **4.5 Outros supostos.**

1. A expedición de informe en contestación á consulta previa segundo o **artigo 6 da ordenanza reguladora da apertura de establecementos** para o exercicio de actividades non sometidas a avaliación da incidencia ambiental devengar unha taxa de **10,00 €**.
2. Para expedientes os que requiran actuacións previas complexas para a súa tramitación, repercutiráselles un custo de **30,00 €**.

#### **Artigo 5. DEVENGO.**

1. Devéngase a taxa e nace a correspondente obriga de contribuír, cando se inicie a actividade municipal que constitúe o feito imponible. Para estes efectos, entenderase iniciada a dita actividade no momento de emisión da acta que determine a verificación do cumprimento dos requisitos establecidos na lexislación sectorial.

2. A obriga de contribuír, unha vez nacida, non se verá afectada en ningún modo pola cláusula de actividade ou suspensión temporal desta.

Non obstante, se antes de dictarse resolución que poña fin ao procedemento de inspección, comprobación e control se produce o desistimento da solicitude, por escrito, a cota tributaria reducirase ao **50%**.

#### **Artigo 6. XESTIÓN.**

Antes de emitir a acta que determine a verificación do cumprimento dos requisitos establecidos na lexislación sectorial, en relación coas actividades non suxeitas a autorización ou control previo, xirarase a oportuna liquidación, que será notificada ao suxeito pasivo, debendo ser aboada, en período voluntario, nos seguintes prazos:

- a) Se a notificación da liquidación se realiza entre os **días 1 e 15 de cada mes**, dende a data de recepción da notificación **ata o día 20 do mes posterior** ou, se este non fose hábil o seguinte día.
- b) Se a notificación da liquidación se realiza entre os **días 16 e último de cada mes**, dende a data de recepción da

notificación **ata o día 5 do segundo mes posterior** ou, se este non fose hábil, ata o inmediato día hábil seguinte.

**DISPOSICIÓN DERRADEIRA.**

A modificación da presente ordenanza, que se aprobou polo Pleno na súa sesión de data 24/09/2012, será de aplicación dende o día seguinte á publicación do seu texto íntegro no BOP (12/12/2012) e permanecerá en vigor ata a súa modificación ou derogación expresas.